

Krítika Konstruktivo

Añanan pasá, un hòmbèr di edat atvansá, su nietu, i buriku a sali di Rincon pa bai Lac. Yegando Nort Saliña tur sodá i kansá, un habitante di e bario aki a remarká, “Boso ta hasi ko’i kèns pa kana. Subi riba e buriku.” Tur dos a subi i a sigui pa Antriol. Ei nan a haña un skual: “Piká boso ta hasi ku e bestia obligando e pa karga dos hende!” E mucha a baha i laga su abuelo sigui kore buriku. Na Nikiboko, un habitante, a opservá, “E hòmbèr ta kruel pa obligá e pobersito mucha kana mientras e ta sinta dushi riba e buriku.” E ansiano a baha i e mucha a subi. Ma na Tera Korá nan a zundra e mucha. “Ko’i abuso e mucha ta hasi ku e pachi! Esta bèrgwensa ku e pachi tin ku kana!” Segun nos por komprendé, último biaha ku hende a mira e trio, e ansiano i e mucha tabata bai den direkshon di Lac, **kargando** e buriku.

Krítika ta un echu di bida. Kiko ku bo hasi, ta parse ku tin hende ku ta kla pa kritiká. I si bo disidí di hasi nada...nan lo kritiká esei tambe! Talbes nos por haña e impreshon ku nos a lubidá kon pa papia bon di hende.

Hopi espasio den korant i un parti grandi di boletin di notisia ta dediká na krítika di un òf otro índole. Kisas un suidadano ta kritiká gobièrno. Tin ora un empleado ta kritiká su doño di trabou. Por ta un kliente ta kritiká e komersiante. Talbes un parokiano ta kritiká pastor. Mirones ta kritiká deportista. I konstant un polítiko òf un partido polítiko ta kritiká otro.

Tin ora e krítika ta onónimo. Otro tempu e krítika ta bin di hende ku ta parse tin talento spesial pa kritiká, pasobra masha poko kos ta skapa nan bista skèrpi.

Hopi hende ta aploudí krítika komo algu sano pa nos komunidad. Ma krítika por hasi hopi daño. Algu tan destruktivo por ta sano?

Si nos ta onesto, nos tin ku atmití ku nos tur, tempran òf lat, ta kulpabel di e klase di komunikashon negativo aki. Nos tur tin e tendensia pa mira loke ta malu den otro hende promé ku nos ta mira e bon. Esaki ta fásil pa ripará. Si mi dunábo un papel blanku ku un vlèk chikitu pretu i ta puntra kiko bo ta mira, mes ora lo bo respondé, “un vlèk pretu.” Poko hende ta respondé “un papel blanku” maske mayoria di e papel ta limpi. Ora bo yu ta mustrábo su rapòrt, tur 7 i 8 ta bira invisibel pa bo bista, mientras e solitario 5 pa materia hulandes ta manera un bandera korá dilanti un toro brabu...i bo kasi ta ataká e yu ku e mesun furia di toro brabu.

Si bo ta stima un hende di berdat, lo bo no piki kada pieu ku bo ta ripará den su bida. Beibel ta papia di esaki ora e ta bisa ku “*amor lo kubri un multitud di piká*” (1 Pedro 4:8). Pa motibu di amor, difisilmente un mama ta ripará e foutnan di su yu.

Ma amor pa un persona no ke men ku nos mester ignorá su fayonan. Al kontrario, si bo stima un persona di berdat, lo bo hala su atenshon riba su pikánan. Ma bo mester papia “*e berdat den amor*” (Efesionan 4:15). Esei ta unda krítika **konstruktivo** ta na su lugá (en kontraste di krítika destruktivo). Krítika konstruktivo **ta deseá solamente bon pa e resipiente di krítika**. Esaki ta **krítika ku ta penábo pa trese dilanti**. Esaki ta **krítika ku ta ataká e problema, no e persona**. Esaki ta **krítika duná ku un aktitut umilde**, un aktitut ku ta rekonosé su eror ora ta sali na kla ku esun ku a kritiká mes a kiboká. Esaki ta **krítika na kara di e persona**—no tras di su lomba. Esaki ta **krítika ku lo aserká e persona konserní personalmente promé ku ta publiká e reklamo**. Esaki ta e tipo di krítika ku nos tin mester.

Klaramente krítika konstruktivo ta hasi falta riba nos isla. Tantu hende ta kritiká anto skonde tras di e ekskusa ku nan ta trese nan punto di bista dilanti “pa bienestar di nos isla.” Ma ki dia nan lo kòrda bienestar di e persona ku nan ta kritiká? Ta korekto pa kaba ku hende pa duna hende un mihó impreshon di bo mes, òf pa haña mas voto, òf pasobra bo ta kayente pa papia, òf...? Krítika asina ta destruktivo. Si bo lenga ta destruí otro habitante di bo isla, bo ta masha hipókrita pa riska bisa ku e krítika ta pa bienestar di bo isla.

Beibel ta bisa “*No laga ningun palabra dañino sali for di boso boka, sino solamente palabra ku ta bon pa edifikashon, konforme e nesesidat di e momentu...*” (Efesionan 4:29).